



# KATILINGBAN

Ang opisyal nga pamantalaan sa Basic Ecclesial Communities (BEC) sa parokya sa Naval

Vol 1, No. 7

website: [www.geocities.com/navaldiocese](http://www.geocities.com/navaldiocese)

Pebrero 2005



## Pamalandong sa EBANGHELYO

**Febrero 6, 2005:** Ikalima nga Domingo “Sulod sa Tuig”  
Basahon: Isaias 58: 7-10 / 1 Cor. 2: 1-5/ Mateo 5:13-16

### Tema:

Ang ebanghelyo karong adlaw mihingpit sa gihisgotan sa miaging Domingo. Sila nga gipanglutos giisip ni Jesus nga “bulahan!” Karong adlaw gibutyag niya kon kinsa ug unsa sila. Sama diay sila sa asin sa katawhan ug sa kahayag sa kalibutan. Kinahanglan nga atong sabton kining maong mga paglarawan. Pananglit, diha sa kasulatan gisugo ang paggamit og asin sa tanan nga ihalad ngadto sa Dios. Kini giisip nga ilhanan sa kasabutan ( Lev 2: 13, Num 18:19). Alang sa mga Israelita, ang kahayag mao ang simbolo sa pagpadayag sa Mesiyas nga nagmadaugon batok sa kangitngit sa paganismo.

Busa kinahanglan magkinabuhi usab kita isip asin alang sa katawhan ug isip kahayag sa kalibutan. Si Propeta Isaias ang mitultol kanato niining maong dalan. Pulong pa niya: “Kon tinguhaon nato ang kaangayan alang sa mga gilupigan ug ang pagtabang kanila nga nanginahanglan, kita nagmatinud-anon sa atong misyon sa pag-amping, sa pag- amoma ug sa paglamdag sa tanang katawhan.” Pinaagi sa atong kinabuhi, si Jesu Cristo, ang matuod nga kahayag sa kalibutan, modan-ag sa kangitngit, ang kangitngit nga dili gayod mahimong modaog batok niining kahayag.

### Pamalandongi kini:

Sa imong pagkinabuhi isip sumusunod ni Jesu Cristo, ikaw nakahatag bag lami sa kinabuhi sa uban? Ikaw midan-ag ba sa kahayag ni Cristo ngadto sa kalibutan ilabi na kanila nga anaa sa kangitngit sa sala?

**Febrero 13, 2005:** Unang Domingo sa Kwaresma  
Basahon: Genesis 2:7-9; 3:1-7 / Roma 5:12-19 /  
Mateo 4:1-11

### Tema:

Sugdan nato ang kap-atan ka adlaw nga panaw didto sa kamingawan diin ang bag-ong Adan nahimong mas gawasnon samtang mas gibaid pag-ayo ang konsensya. Hiniusa sa tanan nga nag-antus gumikan sa kagutom ug pagpanlupig, si Jesus, ang bag-ong Moises, mipuyo pag-usab sa kap-atan ka tuig nga panlimbasog sa Israel didto sa kamingawan sa dihang mibiya sila gikan sa Ehipto. Pinaagi sa mga paglarawan nga gisaysay niining mga kapaitan, ang mga ebanghelista nagsugyot nga si Jesus, matuod nga Dios ug matuod nga tawo, gitintal ni Satanas sa tibuok niyang kinabuhi.

Ang misyon ni Jesus maoy gipunayg atake sa iyang kaaway. Makadawat kaha siya nga mamahimong kabus, sinalikway ug huyang? Basin bayag mohimo lang dayon siyag milagro kay dili siya buot mag-antus? Matag higayon nga sulayon si Jesus aron magpaka Mesiyas siya sumala sa kalibutanong panlantaw, dihadiha wad-on dayon niya kini sa iyang hunahuna kay bugtong man siyang misalig sa pulong sa Dios. Mipahilayo siya gikan sa panon sa katawhan nga buot mohimo kaniyang hari tungod kay nakasaksi man sila sa mga katingalaan niyang nabuhat. Gani gibadlong niya si Pedro nga buot nga buot mopahisalaag kaniya gikan sa dalan sa iyang kasakitan. Si Jesus buot moinon sa mapait nga kopa sa iyang kamatayon, dili aron iyang luwason ang iyang kaugaulingon kon ilansang na siya sa Krus.

Kini maoy makapakang kanato sa atong mga paghukom, sa atong kahakog, sa atong dili ka pugngang nga ambisyon. Sa pagsunod nato sa Kwaresma, angay nga atong pamalandongan ang mga butang nga atong gipakabililhon. Angay nga sud-ongon nato si Jesus ug tukion nato ang pulong sa Dios nga maoy nagtukmod kaniya sa tanan niyang mga buhat

**Pamalandongi kini:**

Unsa may nagtukmod kanimo sa imong mga gibuhat? Sa matag higayon nga sulayon ka, modangop ka ba dayon sa Ginoo aron wad-on niya ang imong pag-antus o andam ka ba hinoon nga modawat ug moantus niini uban sa nag-antus nga Ginoo ?

**Febrero 20, 2005:** Ikaduhang Domingo sa Kwaresma  
Basahon: Genesis 12:1-4 / 2 Tm.1:8-10 / Mateo 17:1-9

**Tema:**

Niining ikaduhang hugna sa atong panaw sulod sa Kwaresma, mahibalag nato si Jesus kansang nawong nausab didto sa bukid. Kining maong sugilanon nahimong larawan nga kinahanglan natong handurawon, usa ka lantawon diin makita nato ang balaan ug misteryosong kalibutan nga haduol na apan sa samang higayon halayo pa.

Sa ebanghelyo sumala ni San Mateo, kini nahitabo sa wala pa gani semana human gibutyag ni Jesus ngadto sa iyang mga tinun-an ang mahitungod sa iyang pagpasakit ug sa ila unyang bahin niini. Ang tulo ka mga tinun-an nga nakasaksi sa himaya ni Jesus didto sa bukid nalig-on sa pagsaksi nila sa iyang pagpasakit didto sa tanaman. Bisan tuod ang nawong ni Jesus gihulga sa landong sa kamatayon, apan ang labihan nga kasanag sa Pagkabhawan nakit-an na. Sila si Moises ug si Elias nag-alirong kaniya. Pinaagi sa iyang presensya kining duha ka mga saksi sa karaang kasabutan nagmatuod nga taliabot na ang katapusang adlaw, ang pagpakita sa gipaabot nga mga bantugang propeta. Anaa usab ang Amahan diha sa panganod, ug sama sa pagbunyag ni Jesus, ang tingog sa

Amahan diha diha nagpadayag sa sekreto ni Jesus nga taga-Nazareth. Pulong pa sa maong tingog: *“Kini mao ang akong pinalanggang Anak. Pamatia siya. Dawata diha kaniya ug diha sa inyong kaugalingon ang masigpit nga dalan sa pag-antus ug sa himaya, sa kahuyang ug sa gahum, sa kamatayon ug sa kabanhawan.”*

Ug panahon na sa pagkanaog balik ngadto sa patag aron ipadayon ang panaw nunot sa sulugoon. Sa dili madugay ang mga panganod sa Golgota motabon sa kahayag niining nausab nga nawong. Didto wala nay makit-an, daw wala nay lauman pa. Apan ang maong kahayag nga misanag dili limbongan, ni ang maong panan-awon usa ka lingla. Ang pagbanag-banag sa Kabanhawan maoy mopadayag nga ang kinabuhi makabuntog diay sa kamatayon.


**Pamalandongi kini:**

Sa imong bunyag ikaw giangkong usab sa Amahan nga iyang anak. Giunsa man nimo pagpakita nga siya imong Amahan, ug nga ikaw iyang anak? Ikaw, nagpakita ba nga igsoon niadtong mga nabunyagan? Sa panahon nga dulom ang imong kinabuhi milaum ka ba sa kahayag sa kabanhawan nga gipadayag ni Jesus, imong igsoon?

**Febrero 27, 2005:** Ikatulo nga Domingo sa Kwaresma  
Basahon: Exodo 17:3-7/ Rom. 5:1-2, 5-8 / Juan 4: 5-42

**Tema:**

Udto kadto didto sa may atabay ni Jacob. Lapoy gikan sa iyang panaw, si Jesus mihunong aron mopahulay. Gigutom ug giuhaw siya. Unya miabot ang Samaritana aron pagkawos ug tubig. Siguro,



**KATILINGBAN**  
Ang pagpapalipit nga naghatag sa Basikong Espirituwal nga Komunidad (BEC) sa panahon sa Misyon

*Circulation Managers:*  
Jorge Manco  
Danilo Jayubo  
Jonnel Quilaneta  
Alfredo Olaer

**TEAM MINISTRY**  
*Team Moderator:* Bishop Filomeno G. Bactol, D.D.  
*Team Members:* Fr. Marvyn A. Maceda  
Fr. Benjamin C. Pantas  
Fr. Jesus G. Ty  
Fr. Kenneth Hendricks  
Fr. Dario Bebillio  
Fr. Bing Colasito

*Editors:*  
Alfredo Paghubasan

*Writers/Researchers:*  
Salvador Castro      Reymund Icaín  
Ramises Bongabong      Linda Roldan  
Eudoxia Canonoy      Necitas Casado  
Catalina Machete      Gualberto Tonelete

*Encoders:*  
Vinna Z. Sabroso      Sonia S. Pitao  
Josephine C. Romero

*Business Managers:*  
Rizalito V. Curso  
Conchita Calvez

*Computer Specialist*  
Oscar O. Borrinaga

gituyo niya nga niining mainit nga kaudtohon siya mokawos ug tubig aron wala siyay mahibalag nga tawo kay lagi dautan man siya'g dungog. Apan didto hinuoy naglingkod sa may atabay. Kinsa kaha siya? Usa siya ka Judio. Atong nasayran nga ang mga Judio dili makig-uban sa mga Samaritano. Karaang sugilanon kadtong ilang panagbangi. Nahadlok man gud ang mga Judio nga matakdan sa kahugawan sa mga Samaritano. Unsaon man gud, ang mga Samaritano nakigminyoyay man sa mga langyaw sa dihang nabihag sila.

Sa mga mata ni Jesus, ang Samaria susama gayod niining babaye nga may lima ka bana. Nahimo siyang babaye nga dautag dungog kay misimba man siya ug mga diosdios. Apan ang Pulong sa Dios giuhaw. Iyang gitinguha ang pagtuo niining maong babaye. Nakigdula siya sa maong babaye pinaagig nga pangutana. Sa iyang pagpangutana, gibuksan ni Jesus ang kasingkasing niining babayhana. Nakapangutana gayod ang babaye sa iyang kaugalingon: Kinsa ba kining tawhana nga mas labaw pa kang Jacob? Propeta ba siya? Siya ba kaha ang Mesiyas? Human matagbaw sa tubig sa kinabuhi, ang Samaritana midagan ngadto sa iyang kasilinganan ug gisangyaw niya ang maayong balita mahitungod sa misteryo ni Jesus.

Karon natagbaw na ang kagutom sa Pulong sa Dios. Dinhi gisugdan na pagtuman ni Jesus ang iyang misyon. Iyang gipasulod ang babaye ngadto sa kinabuhi sa pagtuo ug iyang gidala ngadto sa Dios ang matuod nga mga magsisimba kaniya. Ang mga Samaritano misugod na pagsubay niining dalana. Ug ang ilang pagsunod kang Jesus, ang Manluluwas sa kalibutan, daan nang naghulagway sa kamabungahon sa ebanghelyo kon kini masangyaw ngadto sa tanang kautlanan sa yuta..

**Pamalandongi kini:**

Isip binunyagan kaakohan ug katungdanan mo ang pagsangyaw sa maayong balita ngadto sa imong isigkatawo. Imo ba kining gituman?

Found PNB Passbook:  
  
Owner: Florna N. Borrinaga &/or Anatalia Borrinaga  
Claim at BEC Office, Apostolic Center, Naval, Biliran

**B E C B A L I T A**

**Diocesan Eucharistic Congress  
Gilunsad**

Opisyal nga gilunsad sa Diocesis sa Naval ang Diocesan Eucharistic Congress niadtong Enero 27, 2005 alas singko sa hapon sa Cathedral.

Kini gibuhat pinaagi sa usa nga santos nga misa nga gipangunahan ni Msgr. Silas Florencio - ang Vicar General ug Pastoral Action Director. Ang maong kalihukan gitambongan sa mahal nga obispo, mga kaparian, mga miembro sa BEC Parish Formation Teams sa diocesis sa Naval ug ang lumulopyo sa parokya sa Naval.

Ang October 2004 – October 2005 gidiklarar sa Santo Papa nga International Year of the Eucharistic. Ang tema sa maong kasaulogan mao ang “Mary, Woman of the Eucharist”.

Gibuhat usab ang Fellowship sa tanang BEC-Parish Formation Teams (PFTs) sa tibuok diocesis sa Naval. Ang tema sa maong pangtigom mao ang “*One body, One bread, One journey*”

**BAG-ONG BEC**

Moabot na sa 52 ka Basic Ecclesial Communities (BEC) ang natukod sa parokya sa Naval. Kini human mapahigayon sa duha ka grupo sa Parish Formation Teams (PFTs) ang BEC-Basic Orientation Seminar sa upat ka mga lugar sulod sa buwan sa Enero. Una, sa Ilaya Central diin ang ilang napili nga presidente mao si Bro. Antolin Ybanez; Ikaduha, mao ang Ilaya South ug ang napiling presidente mao si Sis. Isabeda Curso; Ikatulo, didto sa Bernardes Village diin ang napili nga presidente mao si Sis. Marilyn Gomez; Ikaupat, didto sa Brgy Anislagan napiling presidente mao si Bro. Ereneo Sacerdor.

**BEC ANNIVERSARY**  
**BEC Hospital Drive**  
February 15, 2005  
  
**BEC Caraycaray (Zone 4)**  
February 22, 2005  
  
**BEC Sto. Niño Proper**  
February 28, 2005

**PASAYLOA AKO GINOO**



**GINOONG DIOS**

KORO:

PASAYLOA- AKO GINOO  
 PASAYLO-A UG KALOY-I  
 PASAYLOA UG PAMATI-A  
 PASAYLO-A UG TABANGI

1.) NAKASASALA AKO KANIMO  
 NAGAASOY ANG KALAG KO  
 UG AKO GINABASULAN  
 ANG DAGHAN NGA KASAYPANAN.

2.) AKO NASASAKITAN  
 LABIS NGA PALABI-LABI  
 KAY ANG DUGHAN MO NASISI  
 OH DIOS SA KALANGITAN

3.) AKO MAO ANG KAHOY  
 MABUG-AT DILI SAMAHAN  
 GI-ANTUS MO UG GIPAS-AN  
 MAPAIT NGA PAGKAHIMTANG.

4.) NAWONG KO TINABUNAN  
 LUHA SA KAGUL-ANAN  
 DILA KO NAGATUG-AN  
 KASAKIT KAMATUORAN.

5.) KANAKO ANG KASAKITAN  
 DUGO IMONG GIHALAD  
 UG IMO PA GIHATAG  
 GUGMA DILI HITUPNGAN

6.) AKO KANIMO GIBALUS  
 ANG KASAL-ANA NGA DAMO  
 ANG KALIS PIPUNO KO  
 WAY ISIP NGA KABUNGALOS

7.) UG AKO NAGAHINULSOL  
 TUGOB SA MGA LUHA  
 PAGSAAD UG PAGBASUL

8.) KALIGUTGOT MO PAPASON  
 GAMHANAN MAKAAHADLOK  
 SA BIRHEN MALOLOY-ON  
 IYANG PAG-AMPO UG KAANDOK

9.) KAMOT MO MAHIGUGMAON  
 MAG-GAKOS IMONG ULIPON  
 TIMAAN LABING MALIG-ON  
 SA HIGUGMA MO NGA DAYON.

**DIOS NAMO SA KALOY**

DIOS NAMO SA KALUOY  
 IKAW ANG AMONG AMAHAN  
 MAGBUBUHAT, MANUNUBOS  
 UG GINOO SA NGATANAN.

KORO:

HESUS, MALUOY KA KANAMO  
 PASAYOLOON MO KAMI  
 ANG SALA GIDUMTAN NAMO  
 DILI NA MAG-USAB KAMI

NAMATAY SI JESUKRISTO  
 DIDTO SA KALBARYO  
 ARON NGA KITA MALUWAS  
 SA KASUBO NGA DAKO.

ANG SALA SA MGA TAWO  
 NAGAPAANTUS KANG JESUS  
 UG DIDTO SA KALBARYO  
 GILANSANG SIYA SA KRUS.

GIHAMPAK ANG MANUNUBOS  
 SA MGA TAWO NGA DAUTAN  
 ARON KITA PASAYLOON  
 SA ATO NGA MGA SALA

GINOONG DIOS KALOY-A NA  
 ANG IMONG LUNGSOD  
 TUNGOD SA IMONG GUGMA  
 NGA WALAY SUKOD.

ANG MGA UTANG  
 UG ANG AMONG KALAPASAN  
 INTAW'N PAPASA  
 UG AYAW HINUMDUMI.

SA NGALAN NI HESUS  
 ANG MANLULUWAS  
 GISANGPIT KA KARON  
 NGA AMONG AMAHAN.

Atong i-ampo ang daling pagkaayo sa atong pari nga si Fr. Bing Colasito, diin siya gi-operahan sa "Gallbladder stone" niadtong Pebrero 8, 2005 didto sa Chunghua Hospital, Cebu City.

Gipaabot sa atong mga kaparian ang dakong pagpasalamat sa tanang naghilad panahon sa misa dihang atong gisaulog ang kapistahan sa mahal nga Birhen sa Santos nga Pagrosaryo niadtong milabay nga Enero 28, 2005.

Congratulations to:  
 BEC-Parish Formation Team  
**2<sup>nd</sup> Anniversary**  
 February 9, 2005

Happy Birthday:  
**Fr. Marvyn A. Maceda**  
 February 14, 2005

**MONTHLY  
 BEC FELLOWSHIP**  
*(Presidents & Selda Alagad)*

**Libtong Gamay Chapel**  
 Host: BEC Libtong Gamay  
 February 19, 2005  
 -oOo-

**Talustusan Chapel**  
 Host: BEC Talustusan  
 February 20, 2005